

Ubutumwa Yezu Kristu yahaye Nyiramukiza Valentine bwo kugeza ku bantu basenga, tariki ya 13/2/2021 saa cyenda na mirongo ine z'ijoro iwe - Rue Juliette Whytsman, 4 - 1050 Ixelles.

Yezu : Nyiramukiza, mwana wanjye nkunda, hagarika ibyo urimo ngutume.

Valentine : Papa, karamwe. Ndi hano ngo unkoresha icyo ushaka kandi untume aho ushaka kuko ndi igikoresho cyawe.

Yezu : Untege amatwi yombi ntumvugiremo kandi ntunsobanuze kuko nasobanuye kenshi. Urabyumva neza mwana wa !

Valentine : Yego Papa ! Nabyumvise, kandi urakoze cyane ndabyubahiriza.

Yezu : Ngiye kugutuma ku bihayimana b'ingeri zose, cyane cyane abo mu gihugu uvukamo cy'u Rwanda, guhera ibukuru ukagera hasi no ku bakristu basenga b'ingeri zose. Nimushikame musenge nta buryarya kuko ibihe birakomeye.

Nimuhaguruke murwane ku kiri icyanyu. Ndavuga mwebwe bihayimana : ba Kardinali, basenyeli, bapadiri bakuru n'ababungirije, ba diacres namwe bihayimana mu buryo bundi.

Bakuru b'amadini muri he ko insengero zanyu zifunze ? Igihe kirageze ngo murwane ku kiri icyanyu, bana banjye.

Muhaguruke murwane kw'itegeko ry'Imana, itegeko ryo kurengera ikiremamuntu, itegeko ry'urukundo, itegeko ry'ubusabane, itegeko ryo kurengera abakristu.

Ndabasabye, nongeye kubibasubiriramo kuko nari nabibabwiye nti : Muhaguruke mufungure za kiriziya, mwirinde kwanduzanya no kwanduzwa. Mu kiriziya ntabwo ariho ubwandu buri, mu kiriziya ntabwo ariho iki cyorezo kihishe.

Mu kiriziya ni ho hari agakiza. Mu nsengero ni ho hari agakiza kuko aho hose ni ho haronkerwa imbaraga za Roho Mutagatifu, Umwuka wera.

Mu Kiriziya ni ho hari umwuka utanduye kuko muba munsanga kuri Altari ntagatifu mbategereje ngo mbakire imitwaro mufite ku mutima, mbaruhure kuko ni ho hari umwuka utanduye, ni ho hari ijamba ryanjye.

Muhaguruke mwerekane uwo mukorera, mutsinde ubakoresha mu bitari byo, ubakoresha mu bwoba, ubakoresha mu by'isi.

Nimukorere uwo mwiyegeye, murwane ku mbaga nyamwinshi mushinzwe y'abakristu nkuko Leta yagombye kurwana ku baturage bayo.

Muri abaturage ba Leta, ariko na mwe Leta ibakorera, na mwe mukayikorera kuko na mwe muri Leta ubwanyu, kuko mufite ubutegetsi bwanyu buturuka mu ijuru ku Mana y'ukuri.

Ubu nongeye kuza kubaburira kubera ko ibyo twababwiye Jyewe na Mama (Bikira Mariya) tuza kubasura i Kibeho mu Rwanda, na n'ubu muracyanangiye imitima. Twabwiye abihayimana ngo bahamagarire abakristu gusenga, ngo birinde kuzatungurwa n'umwanzi uzaza ashaka kuzabamenyera amaraso, azameneka hose mu mpande z'igihugu cyose mu mazi y'inyanja no mu bibaya ntibabyumva, imbaga nyamwinshi zirahashiririra n'inzirakarengane.

Nongeye kubisubiramo rero, ubu nimuhaguruke muhamagarire abakristu gusenga, mwaba muri hanze, hejuru mu kirere, mu muhanda mu modoka zanyu mufungure ibirahure musingize Imana, aho mwaba muri hose.

Muhumurize abantu : abarwaye, abashonje, abihebye, inzirakarengane zose kuko ni wo murimo w'abihayimana.

Muhe abakristu amasakaramentu yabo ya nyuma.

Mufate ishapule zanyu zibe intwari zanyu, zibe akabando kanyu nk'uko mwabibwiwe kuva kera.

Ijambo ry'Imana rijye ribajyana ribaherekeze rinabatahane.

Nimukorere mu rumuri no mu mucyo.

Nimukorere muri Roho Mutagatifu.

Ikindi mbasaba, bihayimana bo mu Rwanda : amahoro azaza muri Kiliziya ari uko mwafashe abihayimana bakuru baguye ku gasi nyuma y'ingo zabo bari bashinzwe. Munyumve, neza bana banjye, ndashaka kuvuga abasenyeli bapfuye, bagapfira ahatari muri za Diyosezi bari bashinzwe.

Igihe bataraherekezwa ngo babasomere misa mu cyubahiro, babazereho babarekure bagende bahambwe muri Diyosezi zabo, ngo na bo barekure inkoni bafite z'ubushumbira bazihe ababasimbura, nta mahoro Kiliziya izagira ndetse n'igihugu cyose kuko izo nkoni bagifite mu maboko yabo ni zo zituma amahoro abura mu Rwanda no kw'isi yose kuko ni amahano akomeza.

Izo nkoni bazifashe bayoboye intama zanjye.

N'ababasimbuye ntabwo ari zo bafashe kuko zagombaga gutangwa bamaze guherekezwa mu cyubahiro mubahaye uruhushya ngo bagende.

Bana banjye, ndabingize ngo mukore igikwiye kuko bategereje ko mubarekura.

Ngicyo igihango kiri kubakurikirana.

Ngicyi igihango mwatatiye kiri gutuma abantu babura amahoro aho bari hose, cyane cyane ndabwira abihayimana : karidinali, abasenyeli, abapadiri n'abategetsi.

Nimubavane ku ngoyi, mubareke baruhuke, baruhukire aho bateguriwe, bakoreye bakiri bazima kuko umuntu azabazwa ibye yakoze ataturanyije. Natumye kuri aba basenyeli ngo bareke guta ingo zabo, ko nibagenda batagaruka, ko bazagwayo kubamenya bikazaruhanya, babwira uwo ntumye Nyiramukiza ko bidashoboka, ko Yezu bavugana nawe buri muni, ko atari ngombwa ko aza kubabwira ibyo yitekerereje. None se baragarutse ?

Bari he ? Ibyo nabatumyeho ni byo byababayeho n'ubu bakiri hanze y'ingo zabo bamwe. Muri bo, uwemeye ko ibyo mbatumyeho ari byo, ari ukuri, yaranyumviye arabyemera ntiyagenda, ntacyo yabaye icyo gihe, yajyanywe n'uburwayi nk'uko nabimubwiye.

Umukuru w'igihugu, Perezida wariho icyo gihe, nawe namutumyeho. Jyewe ubwanjye ndakubwira nti « ntasige umuryango we ngo ajye Arusha, ko nagenda atari bugaruke ari muzima n'ingingo ze zose », mbibwira n'Umwana we. Ikindi, ko nyuma ye hazameneka amaraso menshi y'inzirakarengane, induru n'imiborongo bigakwira mu gihugu no kw'isi yose, kandi naraje gusura i Kibeho mu Rwanda rwanyu ngo mbabwirire ibigiye kubabaho mu gihugu cyose nimudakundana buri muntu n'undi uko ari kose. Arasubiza ati: « ndabizi, ndabyumva, ndabibona ariko nta kundi reka ngende. Umbwirire uwo Mubyeyi ko mukunda ariko ko nta kundi nabigenza, ndananiwe ko

byose bingerekwa ho, bibe uko byakabaye ». Ati : « Umunsabire imbabazi ko mbirenzeho nkagenda. »

Ibyo mbabwira ni ko byagenze ntiyagarutse ari muzima ngo asubire mu muryango we. Umukuru wese utarahambwe mu cyubahiro atera impagarara mu muryango. Ibyo mbabwira ndabizi, bana banjye, n’abo mvuga ndabazi. Ni cyo kiri kubakurikirana.

Nimushyngure abaheze mu cyeragati bese, mubasomere misa, mubasezereho mubarekure bagende aho bateguriwe mw’ihirwe. Mwikwitera umuvumo, bana banjye.

Banyarwanda bana banjye, ndabakunda kuko ndi Yezu Kristu wabasuye ngo mbaburire mbakomeze, Ubabarira igihe cyose muza munsanga.

Nkeneye ko mwicuza mugasaba imbabazi, mukababarira, mukababarirana.

Igihe kirageze ngo buri muntu wese amenye ko aremwe mw’ishusho ry’Imana kuko mwese mbatuyemo, keretse abagenda banyivanamo bagasigara ari ibipampara gusa na byo biriho.

Mwahaye shitani icyicaro kubera ko twababuriye ntimwumve, na n’ubu mukaba mukinangiye imitima.

Aho gusenga murihisha. Murebe abo bana bese bari impande zose, sinkoza isoni ndabingize.

Nk’uko nemera ko muhindura umugati na divayi, waba wicujije cyangwa se uticujije, waba wanduye cyangwa wakarabye, ndemera nkamanuka kugirango ndamire abana banjye. Bamwe babikora nk’itegeko n’akazi, n’umuhango kuri bamwe na bamwe, nzajya niyuzuriza ahasigaye.

Nje kubibabwira mbabaye cyane kugirango mwirinde andi maraso yiyongera ku yamenetse, yakomeje kumeneka, atarigeze ahagarara kumeneka mu gihugu cyanyu na n’ubu akimeneka.

I Kibeho naberetse ikibaya gishashe cyuzuye imipanga, cyuzuye imihoro, cyuzuye amacumu, cyuzuye amaraso, bamwe bakata abandi imitwe, abandi bakarigita. Ibyo byose mubigira umugani. Icyo kibaya murakizi mwese.

Nongeye kudasaba, bihayimana bana banjye, ngo Kiriziya zoye kuba uburuhukiro bw’inzirakarengane zitahambwe mu cyubahiro cyazo, ngo zimwe zibone umwanya wo gusabira abazo basize inyuma. Ndabasabye ngo mwoye kuzigira uburuhukiro, ahubwo zibe ari izo kujyamo kudasabira kugirango abatarakiriwe bashobore kwakirwa aho bakoreye bakiri bazima.

Abasenga nimukomeze, abubaka imitima y’abandi namwe nimuyubake, abafasha abandi nimukomeze mubafashe.

Bana banjye muri umwe, nk’uko na Data wo mw’Ijuru ari umwe na Njye. Mwirinde shitani ibajyana mu muriro w’iteka. Mwiringire Yezu wapfuye akazuka ari We Jyewe ubabwira nonaha, kugirango ubugingo buhoraho iteka bube muri mwebwe.

Uzazira ukuri, uzavugisha ukuri akakuzira nzamwakira. Uzazira ko asenga, uzazira ubutumwa namuhaye akabutumika nzamwakira. Ariko hagowe uzahirika icyo ataretetse, uwica icyo ataremye, nzakimubaza igihe nikigera.

Bana banjye ndababwiye ngo ni mukundane. Mushikame musenge nta buryarya, musenge musabira ibihugu byanyu. Musenge musabira abaturanyi. Musenge musabira impfubyi. Musenge musabira abana bahahamuwe n’ibyo babonye n’ibyo bakomeza kubona bidashira. Musabire abana batagira aho babarizwa, baterwa hejuru hose na bese. Musenge musabira ba bana bandaraye mu mihanda mu bihugu

byabo bavukamo, batagira kivurira, bishwe n'ibiyobyabwenge n'agahinda kadashira, bamwe batazi aho bavuka n'uko bavutse. Musenge musabira abato n'abakuru. Musenge mwisabira. Musenge musabira abapfakazi. Musenge mwisabira kuko iki ni cya gihe tugiye gutangira cya gihe cyo gutotezwa ku Bakristu kubera kuvugisha ukuri, mukavuga ijambo ry'Imana mukarizira. Cya gihe cyo gusengera mu bwigunge kandi amasengero yose ahari afunze.

Bana banjye amabus mugendamo aruzuye. icyo cyorezo mutabona muri bus, ntimukibone aho mwagiye gushaka ibyo kurya mu masoko n'ahandi, muzagisanga muri za kiliziya no mu nsengero ?

Nimutirinda muzakirwara, ariko nimwirinda mukakirwara muzakira.

Musabire abihayimana bave ku bucakara bw'iby'isi, babone urumuri rwa Roho Mutagatifu bashire ubwoba bahaguruke bivane ku ngoyi ibaziritse batabona bamwe na bamwe.

Musabire Kiliziya muhereye hejuru i Roma, musabire Papa, abakardinali, abasenyeli n'abapadiri ngo bafungure Kiliziya, berekane umurimo wabo wo guhaguruka abasenga basaba ko iki cyorezo cyashira.

Iki gisibo, ndabasabye ngo mwisubireho mukosore ibitaratunganye mu gisibo cyashize, ngo iki kibabere isukurwa ry'abemera Kristu bese.

Nimudafungura Kiliziya muri kino gisibo ngo muhamagarire abakristu gusenga, kwihana no kwicuza, gusabana imbabazi no kuzitanga bivuye ku mutima, kugirango habe isukurwa mbere y'uko mugera mu minsi mitagatifu ya Pasika, ngo iyi Pasika ibabere izuka rishya mureke guheranwa n'umwazi wabafunze umunwa akabaheza mu nzu, n'ubundi muzahahera kurushaho mu bundi buryo, kandi ndababuriye ngo usenga by'ukuri azi icyo akora n'uwo akorera, nahaguruke igihe kirageze cyo guhitamo ukuri no gukorera mu kuri.

Nongeye gusubiramo inshuro nyinshi: mufungure kiliziya abana n'abakuru bagarure ubumuntu. Nyamara nzababaza roho zizazimira kubera mwebwe mwanze kuva kw'izima.

Iki gisibo kirimo byinshi bibabaje, kirimo amaraso, imiborogo n'agahinda mu bihugu byinshi. Ibi mbabwiye birakomeye kandi birababaje.

Ibi nkubwiye uzabigeze kuri bese nk'uko usanzwe ubigenza.

Uzemera azemere, utazemera nawe azabireke kuko ushinze kuntumikira, ntushizwe kwemeza abantu kuko igihe kizagera duhure.

Mwana wanjye Nyiramukiza, ndabizi neza ko utotezwa kuko tugutuma kuvugisha ukuri, Njyewe na Mama, kubera ibintu byinshi wamenye uzi neza, wabonye n'amaso yawe. Ibyo twakubwiye byabaye n'ibigiye kuba n'ibizaba, biriya byose ubitse ku mutima wawe. Niyo mpamvu nagukuye muri kiriya cyobo bari bagutayemo muri 1994, nkagukiza ibikomere by'ibyuma baguteye, kwari ukugirango nzagutume kuvugisha ukuri mu gihe abandi bazaba bakorera ijisho n'ingaruka zindi. Waratotejwe ndabizi kandi uzakomeza gutotezwa, ibisigaye ni byo bikomeye. Uzatotezwa cyane ngo bagucecekeshe. Ni yo mpamvu ubabara ngo umfashe gukiza isi, kuko unkorera wese ntatotezwe aba afite undi akorera kuko inzira zanjye zirafunganye.

Nyiramukiza mwana wanjye nkunda, ntukababazwe n'uko batakwemeye mu babonekewe. Uzababazwe n'uko icyo watumwe utagitunganyije.

Kukwemera si cyo cyangombwa kuko na Njye wababonekeye nje kubasura mbakunze no kubaburira ibizaba ngo babyirinde bakundane, ntibanyemeye na n'ubu baranyirengagije. Ubwo rero ntibakwemera kuko badashaka kwemera ko Naje kubasura, Njye na Mama ntidutandukana, baribeshye.

Buracyeye ndagiye kuko mfite akazi kenshi. Ngaho vuga aya masengesho akurikira nguhe umugisha mwana wanjye.

Valentine : Dawe uri mu ijuru..., Ndakuramutsa Mariya..., Hubahwe Imana Data...

Yezu : Nguhaye umugisha wanjye : Kw'izina ry'Imana Data na Mwana na Roho Mutagatifu.
Amina.
Wirirwe, mwana wanjye.

Valentine : Urakoze cyane, Papa. Wirirwe.